



partii naleraq

Qitiusumik kiassaateqarfinnik kissarsuuteqarfinnillu Namminersorlutik Oqartussanit toqqaannangitsumik toqqaannartumilluunniit pigineqartunik atuisinnaanerup Nukissiorfinnut kingusinnerpaamik 1. januar 2020-mi tunniunneqarnissaanik qulakkeerineqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Atuisinnaanerup nuunneqarnera ilutigalugu kiassaateqarfinni aningaasat uninngasuutit Nukissiorfinnut nuunneqassapput. Atuisinnaanerup nuunneqarnerani atortulersuutit aserfallatsaalineqarnissaannut pisussaaffiit atuuttut allanngortinneqassanngillat atortulersuutillu piumasaqaatit Naalakkersuisunit aalajangersarneqartut naapertorlugit aserfallatsaalineqartussaassapput.

Inatsisartuni ilaasortat Anders Olsen, Siumut, Pele Broberg, Partii Naleraq, Nikkulaat Jeremiassen, Siumut aamma Justus Hansen, Demokraatit
(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Sanaartornermut ataatsimiititaliami ilaasortat Anders Olsen, Pele Broberg, Nikkulaat Jeremiassen, Justus Hansen ataatsimoortumik inatsisartut aalajangiiffigisassaannik Naalakkersuisut peqquneqarnissaannik siunnersuuteqarlutik, tassalu Namminersorlutik oqartussanit toqqaannartumik toqqaannangitsumilluunniit pigineqartunik Nukissiorfinnut nuunneqarnissaannik siunnersuuteqarlutik tamannalu saqqummiunneqartoq oqaaseqarfigissavarput.

Siunnersuummi uani Nukissiorfiit pisussaaffilerniarneqarput kiassaateqarfiit aamma taakkua ataaniittut 1. januar 2020 Namminersorlutik oqartussat ataanni toqqaannartumik toqqaannangitsumillu pigineqartut Nukissiorfinnut kingusinnerpaamik 1. Januar 2020 nuunneqarlutik tunniunneqassasut.

Taamatut saqqummiussaqaarneq assut eqqarsarnartipparput. Tassami piffissaq imaalereerpoq, nuussinissarlugu eqqarsaatigissagaanni aningaasatigut kingunerisassai imanngitsorujussuupput, Partii Naleqqamilu isumaqarluinnarpugut tamanna aalajangiisitsiniarneq assut illersoruminaatsoq, Naalakkersuisut inuiaqatigiillu eqqarsaatigalugit.

Tamatta nuannaarutigisatsinnik akit nunarput tamaat appartinneqarlutik assigiissinneqarput, inuiaqatigiinnut assut pitsaasumik kingunilimmik, toqqaannartumik taamatut akinik aaqqiineq aningaasarpassuarnik inuiaqatigiinnut sunniuteqarpoq, tassami atuisut 150 mill angullugit sipaarutissinneqarput, tamannalu aamma anguneqarpoq Nukissiorfiit suleqataalluarnerisigut, manna iluatsillugu Nukissiorfiit nersualaaqqikkusuppagut inuiaqatigiinnut pitsaasumik sunniuteqartumik aaqqiinnermi peqataalluarnerat pillugu.

Kiassateqarfiit uani eqqartorneqartut amerlanerpaat pisoqaapput, annertuumillu aserfallassimallutik tiguneqassappatalu illersorneqarsinnaasumik tigusariaqarpagut, tassami tiguniannarlugit tigussagutsigit atuisunut akiligassat nutaat akilersinniartariaqalissavagut, akinillu appaasimaneq pinngitsoorani kalluarneqartussanngussalluni, qularnanngivipporlu akit qaffannerannik

kinguneqassaaq tamanna, tamannalu massakkut Partii Naleqqami ersarissumik oqaatigissavarput tigusinissaq massakkut peqataaffigisinnaanngilarput.

Aserfallassimasunik ilaatigullu piiannagassanik tiguisoqarsinnaanera pinngitsoornartariaqarparput Nukissiorfiimmi aamma ilisimatitsipput avatanngiisinut tunngasut isiginiartariaqartut soorlu asbeteqartut aammalu uuliaasiviit nutaannginnermik putuulersut ilaatigullu amerlasuut aserfallassimaqisut allaat ukiut 20-it sinnerlugit pisoqaassusillit.

Ersarissumik aamma oqaatigineqarpoq aserfallaatsaaliinikkut annertuumik kinguaattoqqasoqartoq kiassaateqarfiit taakkualu ataanniittut eqqarsaatigalugit.

Aammalu qularisassaannigilaq suliassanik tiguisissagaluarutta massakkut akisunaarujussuarsinnaanngipput, tamannalu aningaasaqarneq eqqarsaatigalugu akillu qaffanneqarsinnaanerat atuisunut illersorneqarsinnaanngimmat massakkut itigartinneqartariaqartoq ersarissumik oqaatigerusupparput.

Narsarsuarmi Kangerlussuarmilu nukissiorneq tiguneqassappat massakkumut inatsisinut naapertuuttumik innallagissat aqputaannut allanullu sunnuteqartussaavoq, assersuutigalugu erngup aqputai kuffiillu qanoq aserfallassimatiginersut ilimagaarput tamakkiisumik massakkut ilisimanngikkipput qanoq aserfallatigisimanersut, naatsorsuutigisamillu pissutsit ajornerussappata taava suli akisunaarisinnaanerput qanittuararsuussaaq, tamannalu atuisunik kissaatigineqarnavianngitsoq takoorloorsinnaavarput.

Isumaqarpugut siunissami pitsaanerusumik tunngavissalimmik tiguserit illersorneqarsinnaassaappata taavalu periarfissaqarnerusumik aaqqissuussaanagerusumillu ingerlanneqassappata piffissaq naammattoq pilersarusiornissat eqqarsaatigalugit periarfissiissutaasariaqartoq atuisut illersorneqarsinnaasumik ingerlatsigineqarnissat.

Aningaasarparujussuit atorneqartussat Naalakkersuisut saqqummiussaani takusinnaavarput sanaartornikkut aningaasaliissutissat ilaatigut 130. mio kr.-it missaani akeqassaaq taavalu Narsarsuaq Kangerlussuarlu ilannguppata 243, mio. Kr.-nit missaani akeqassasoq ersarissumik takuarput, aammalu taakkua qaavisigut ingerlatsinermut akilersuutissat 29. Mio. Kr.-nit missaaniittut ilanngunneqartussaallutik.

Taakkualu suminggaannit akilerneqassappat, soorunami akiliisussat ataasiinnarput, tassalu Nukissiorfiit aningaasanik attartortariaqassapput, taakkualu atuisunik akilerneqassapput, tassalu uanga illillu akiliissaagut, isumaqarpullugu akit apparsimanerat inuiaqatigiinni iluarisimaarneqaqisut mianersualliornikkut massakkut qaffatseqqinneqartariaqanngitsut.

Tunngaviatigut akerinngilarput siunissami tiguserinissat tigusinissallu, kisiannili takusinnaanngilarput 1.januar 2020 tiguserinikkut sukkut atuisunut iluaqutitassaqaqarnersoq. Tassami aserfallassimasut nutartigassallu eqqarsaatigalugit aaqqissuunnissat aningaasarpassuanik malitseqartussaasut tamaattumik isumaqarpugut piffissaq eqqarsaatigilluagaanngitsoq massakkut aalajangissallugu.

Naalakkersuisut Nukissiorfillu isumannaatsumik aaqqiniarnissamik kissaateqarnerat isumaqatigalugu siunnersuut tapersinngilarput, kisiannili allanngutissatut siunnersuut peqataaffigisinnaavarput isumaqaratta 1.januar 2020 periarfissaanngitsoq.

Hans Enoksen